

René Jouveau

Lia dóu Printèms



C.I.E.L. d'Oc

Centre International de l'Écrit en Langue d'Oc

3 Place Joffre, 13130 Berre L'Étang

<http://www.lpl.univ-aix.fr/guests/ciel/>

LIA DÓU PRINTEMS

Lou printèms, tournamai, revèn pèr li chatouno.
Li vióuleto an flouri si sen blanc e redoun.
Li bouco, dins la niue siavo, se fan gloutouno,
Li cor, gounfle d'amour, cercon de cor bessoun.

Dins lis iue de Lia lou cèu blu se miraió,
S'en vai en empourtant soun cors jouine à l'amour,
E de soun amoureux, soun cors jouine pantaio.
I gauto lou desi pinto sa reflamour.

Es un printèms que vai sus si vîo flourido,
Agouloupa de sedo e de tèndre parfum,
Un espèr de niue cando e de douço espelido
Que vai, clar e loughié, flouri dins lou clarun.

Lia, sus ti camin, la joio es semenado,
Un galant meissounié apreparo soun dai
Que vèn pèr meissouna ta tèndro esglariado
Dins un abounde tousc de fisança e d'esmai.

Es lou printèms, Lia, que vèn de pèr lou mounde,
Que vèn pèr la blancour de toun sen fouligaud,
Que vèn pèr qu'à la fin ta jouvènço desbounde
Dins un cande desbord de souspresso e de gau.

Emportes emé tu lou fais de ta jouinesso,
La nèu de toun printèms, li bluiet de tis iue,
Pèr li camin dóu jour, courrènt em' ardidesso
De-vers la croto sournò e pasiblo di niue...

T'en vas, dins lou matin, souto la raisso tèndro
De toun nus reviha pèr lou proumié soulèu
E, de tóuti li flour, Lia, siés pas la mendro
D'aquéli qu'au printèms luis sa jouino nèu.

Lia, vènes de liuen emé ti dos man blanco,
Emé toun pitre dous e ti tèndri ginoun,
Pèr èstre, dins l'amour, la pichouno avalanco
Qu'esquiho, sènsò mai, à soun bèl abandoun.

Li poutoun te faran la flour pèr dous flourido,
La pago dóu printèms en mounedo d'or fin,
A toun sen flourira la resoun de la vido
E dins tis iue l'espèr que jamai a de fin.

Flouriras, flouriras, roso de touto espèro,
Nòstis iue te veiran flourido dins toun nus,
Fresco coume l'encèns, douço coume la mierro,
Sus l'orle enfestouli de toun galant cabus.

E la garbo saras entre li man toumbado,
Saras lou brusc vivènt de tóuti lis espèr;
Lou mirau eserjant de tóuti li pensado,
La nau de touto fam proumesso à bon gouvèr.

E i'aura lou soulèu expandi sus li vò
Dóu mounde, emé lis obro e tu que siés lou pres
Dis obro dóu printèms, lou mèu dous dis abiho
E lou printèms di cors caressaire e tebés.

Ansin di mort d'un tèms regreiarà la vido,
Un dous alen de Pasco alenara de tu
E tóuti li parfum de ta voio ravido
Encencharan, tourna, ta blanco jouventu.

Espèr d'un mounde nòu, espèr d'àutri vitòri,
Lou tramblun de ta car n'en sara lou boutoun;
Au rousié dóu printèms toun estrange espelòri
Sara la gaio ausido, au printèms, dóu quinsoun.

Toun noum sara flouri pèr tóuti li chatouno
Que dins la niue de mai encanto lou sournun,
Saras lou cor en flour de tóuti li poutouno
Qu'au printèms de l'amour counfesson soun chalun.

Espaime d'uno niue, languisoun de proun d'ouro,
Deman, coume au jour d'uei, flouriras au printèms.
Un amoureux plagnun de mourtalo tourtouro
Esvartara dóu sour li darriés espravènt.

Es lou printèms, Lia, dins tóuti li broutiero:
Long dóu Rose, eilavau, li parèu van ana,
Li fiho e li garçoun, pèr uno estranjo guerro
De vano resistènci e de poutoun douna.

Mai tu, Lia, t'en vas à la douço alenado
Que boulo de la mar, emé toun péu au vènt,
Sabènto mai que mai de la tèndro encountrado
Ounte t'endourmiras dins la niue dóu printèms .

Sabes tout dóu matin que frustara toun èstro
E dóu proumié soulèu que toun front toucara,
Sabes qu'à toun jouvènt sara douço menèstro
Lou poutoun matinié que, pèr tu, flourira.

L'aura la vilo, eila, emé si vièii toure
E li pantai d'un tèms que soun li de toujours,
La vilo e si sourgènt pèr que l'on se i'amourre,
La vilo que tambèn sounjo de sis amour.

Au soulèu dóu matin, ta jouvènço flourido
Sus soun bàrri maien de joio s'espoumpis
D'èstre la flour de Mai au matin espelido
Que de soun pur sabé subre tóuti flouris.

L'ome, sèmpre, revèn à toun dous ermitòri,
Pèr ié béure lou vin daura de toun jouvènt,
Liuèn dóu mounde dis ome e de soun van talòri,
Pèr, contro tu, dourmi dins la cansoun dóu vènt.

L'ome, aquéu vouiajour que torno de sa vido,
Vèi enfin dins tis iue la fin de sis afan
E demando à toun sang de chato amourousido
La tèndro avouacioun de toun amour d'enfant.

Mai tu, dins lou matin, nousant toun péu de bloundo
O de bruno, saupras refaire, pèr sa pas,
Li gèste de la ninfo à la sousto di broundo
E que nouso soun péu en levant aut si bras.

Lia, un jour nouvèu de la vido coumènço
Pèr lou tèndre boulé de toun sang de vint an
E lou soulèu de mai enluisis pèr plasènço
Tis espalo e toun front, coume lis iéli, blanc.

Que moustrara lou mounde à tis iue de pervenco
Barralant sènso fin dins si milo draiòu?
Tu, Lia, dins la lus dóu jour, tu, proumierenco,
Saupras dóu bàrri vièi t'auboura sènso pòu,

De ta jouino bèuta vestido coume d'aubo,
Image dóu claran dins lou mounde enaura.
Lia, tout lou soulèu aluminant ta raubo,
Saras l'estèu neven à la terro moustra.

Lou printèms sara dous à toun sang que bluiejo
Souto la blanco pèu de toun sen, de ti man:
Dins li pur courredou de ti veno, l'eirejo
Malandro a pas mescla sa maliço à toun sang.

Saras lou bèu temoui d'un tèms que recoumènço
De pèr lou mounde grand, drecho coume l'espi
E coume éu perfuma, de ta blanco parènço
Aluminant, subran, tout un mounde atupi...

O Lia, tout un mounde atupi te regardo
E coumpren que lou jour fai seguido à la niue:
La vièio, en te vesènt, laisso toumba sa fardo
E crèi coume au bon Diéu au blu dous de tis iue.

Regardo: vèn vers tu di blad l'erso verdalo,
Vers tu, vers toun printèms que candejo au soulèu
Pèr t'oufri lou lié fres di meissoun printanalo
E la gaio cansoun de l'auro e de l'aucèu.

Sabes proun li camin que van de-vers ta joio,
Camin de tèndro pèu, de sujo desresoun,
Tout reviéu au soulèu de ta fogo ninoio
Coume au printèms l'aucèu renais dins li bouissoun.

O Flour! es uno flour blanco qu'as à toun jougne!
La frescour de ta car es lou fru lou plus bèu
Que la naturo en flour nous dounèsse d'ajougne
E lou mai dous, segur, qu'alumine lou cèu.

Quau poudié nous pourgi mai tènre testimòni
Que ti bouco de chato e toun sen trefouli,
Quau pourrié souveta mai cande patrimòni
Que tis espalo nuso e ti ginoun flouri?

Ah! li chambro dóu sèr qu'espèron ta vengudo
Sèmblo que toun parfum lis empligue adeja,
Adeja, de toun nus, sèmblo que l'esmougudo
Varaie dins l'oumbrun ounte vendras ama.

Lis estello dóu cèu pas tant que tu soun blanco
Quand lou darrié velet vèn de toumba de tu
E que, dins lou mirau, s'arredounis toun anco
E ris l'abounde siau de toun pitre bouju.

Quau pòu dire, o Lia, l'esmai de toun sourire
Quand t'aparo plus rèn de tis alust dóu jour
E que lou fio mourènt dou mai dous di martire
A ti gauto adeja fai senti sa cremour?

Es l'ouro qu'à l'amour se semoundon ti bouco,
Que se barron tis iue e se porjon ti bras:
Pèr escouta toun cor, sèmblo que tout s'abouco
E toun amour, tambèn, o Lia, parlo bas.

Es un soufle, un murmure que dins la niue s'eigrelo
E qu'es dous à la niue que ié counèis toun vot,
Dins la niue dóu printèms que l'amour ié fouguelo
Toun tènre parlamen, dins l'oumbro, a milo ecò.

Toun amour sara dous dins la niue que coumènço,
Aquéu que t'amara saupra ta douço fam
E saupras, tu, lou dous de sa tèndro vioulènci
Long de la ribo sournò ounte sarés amant.

La niue, touto la niue sara voste reiaume,
Ié segnourejarés sus de càndi meissoun
E quand la som vendra, vous vuejara soun baume
De lassige countènt e de pantai bessoun.

Lia, la niue de Mai vèn pèr coumpli ta gràci,
Pèr te faire flouri coume flouris la flour.
Mai tu la passes tant en bèuta qu'en audàci
Quand la niue dóu printèms te fai crida d'amour.

Tèste integrau

Còpi interdicho

Reserva pèr aquéli qu'an la licènci d'utilisacioun

C.I.E.L. d'Oc

Centre International de l'Écrit en Langue d'Oc

Sèti souciau:

3, plaço Joffre - 13130 Berro.

Tóuti dre reserva - Tous droits réservés - All right reserved.

© Centre International de l'Écrit en Langue d'Oc - 1996

© Adoubamen dóu tèste: CIEL d'OC, de la meso en pajo: Tricìo Dupuy

e de la maqueto pèr Bernat Giély,

en sa qualita de mèmbe dóu Counsèu d'Amenistracioun dóu CIEL d'Oc.